



UKA 2013/35
10. oktober 2013
Sara Olsvig

Kalaallit Nunaanni pinerluuteqarsimasut singernermiikkut nalunaarsuuteqarlutik angerlarsimaffimmi pineqaatissinneqarsinnaalernissaat anguniarlugu, Naalak-kersuisut Jusititsministerimut attaveqaqqullugit peqquneqarnissaannik Inatsisartut aalajangiiffigisassaattut siunnersuut.

(Inatsisartunut ilaasortat Doris Jakobsen aamma Kristian Jeremiassen, Siumut)

Siumut siunnersuuteqarpoq singernermiutit pineqaatissinneqariaatsitut nunatsinni atugaalissasut. Singernermiutit pineqaatissinneqariaataapput assigiinngitsutigut teknikkikkut pisariaqartitsiffiusut, soorlu pineqaatissinneqarfiusumi oqarasuaatit angallattakkat ajornaatumik atorsinnaasariaqarput, aaqqissugaasumik nakkutiginnittoqartariaqarpoq, kiisalu pineqaatissinneqartup angerlarsimaffik qimariaraangagu pisortani atorfeqartut ornigutiaarsinnaasariaqarlutik.

Kalaallit Nunaanni singernermiutinik aaqqiissuteqarnermut aningaasartuutissat pillugit Folketingip Kalaallit Nunaat pillugu Ataatsimiititaliaatigoortumik siunnersuuteqartup Doris Jakobsenip, Siumut, apeqquteqaataanut danskit justitsministeriat akissuteqaqqammerpoq. Justitsministerip akissuteqarnermini eqqaavaa ukiuni marlunni Nuummiinnaq nakkutiginninnermi immikkut aaqqiissuteqarnissaq ukiumut 5,6 mio. kr.-inik akeqassasoq. Danskit aaqqissuussinerannut pulatillugu aaqqiissuteqartoqarneq, tamanna ajornassanngippat, ukiumut 4 mio. kr.-inik akeqartussaavoq. Pineqaatissinneqartumut ataatsimut naatsorsorlugu tamanna ullormut 1100 kr.-inik naleqassaaq.

Justitsministerip itisiliinermini eqqaavaa aningaasartuutissat allat tamatumunnga ilanngunneqanngitsut. Taamaammat erseqqilluinnarpoq singernermiutinik atuneq inuit pineqaatissinneqartut inissiisarfimmi tigummineqarneraningarnit akikinnerunaviangitsaq.

Justitsministerip aamma oqaatigaa Danmarkimi 300-nik inissaqartoq singernermiuteqartunut naatsorsuussaasunik. Tamatuma naapertorpai Kalaallit Nunaanni inissat qulit.

Tamatuma saniatigut paasinarpoq singernermiutinik aaqqiissuteqarneq Kalaallit Nunaanni tamarmi atorsinnaanngitsaq. Assersuutigalugu Nuummi singernermiutinik aaqqiissuteqartoqassappat taava illoqarfinni, imaluunniit teknikki pissutigalugu piffinni singernermiutinik aaqqiissuteqartoqarfiusinnaanngitsuni, inuit allat assinganik pinerluuteqarsimasut allaasumik pineqartalissapput. Inuit Ataqatigiit isumaqarpugut tamanna erseqqivissumik inunnik assigiinngisitsinerussasoq aammalu inuit pisinnaatitaaffii eqqarsaatigalugit ajornartorsiutaassasoq.

Kalaallit Nunaanni Pinerluttunik Isumaginnittut unammilligassaqarput amerlasuunik anertoorujussuarnillu. Danskit aningaasanut inatsisaatigoortumik pinerluttunik isumaginnittut aningaasalersugaapput siornalu partiit Danmarkimi pinerluttunik isumaginninneq pillugu isumaqatigiissuteqartut isumaqatigiissuteqarput assersuutigalugu inissiisarfimmi nakkutilliisut pitsaannerusumik ilinniartitaasalernissaannut, pitsaannerusumik ilinniartitaasalernissamat, pineqaatissinneqarluni katsorsarneqarnermut suliffeqarnermullu aammalu pinerluttunik isumaginnittoqarfiup tungaatigut illuutitigut ajornartorsiutinik pitsanngorssaanissamat atugassanik immikkoortitsinermik nassataqanngitsumik. Tassa imaappoq

aningaasartuutit amerlisarneqassappata taava missingersuutit pioreersut aallerfigineqartariaqassapput. Taamaammat aningaasat allarpassuatsialassuarnut atorneqarsinnaagaluarput misiligummut nunamut tamarmut atuutinngitsumut, aammalu teknikkikkut assigiinngitsutigut pisarissersuuteqarfiusunut, atornagit.

Illoqarfimmi sorlermi najugaqarneq apeqquaatillugu inuit pineqaatissinneqartut qanoq issagaluarnersunik pineqaatissinneqartarnerisigut assigiinngisitsinermik eqqussinissaq Inuit Ataqatigiit tungaannit tulluarsuusorinngilarput. Aamma misiligummut taama ittumut atugassamut missingersuusiorfigineqarsimanngitsumut aningaasarpaalussuarnik atuinissaq tulluarsuusorinngilarput.

Taamaattoq isumaqarpugut meeqqat inissiisarfimmiittussatut eqqartuussaasimasimasunik angajoqqaartut angajoqqaaminnik qanimut najuinissaminnut pitsaanerusementik periarfissaqartariaqartut. Inissiisarfinni ilaqutariit pulaartarfii torersut meeqqanullu najoruminartut pigineqalernissaat aallaqqaataasinnaavoq. Aamma isumaqarpugut singernermit atornagit inuiaqatigiinnik kiffartuussinerit periarfissatut ullumikkornit atornerusariaqarigut. Tassami suliffeqarneq innuttaasunut ilaalerseqqinnermut aqutissaalluarnaruvoq inissiisarfimmi angerlarsimaffimmiluunniit ilatsiinnarnerminngarnit.

Tamanna pillugu siunnersuut tapersinngilarput.